

U ovom broju, između ostalog, čitajte:

- **UPFBiH od Vlade FBiH traži prolongiranje obustave saobraćaja zbog rekonstrukcije tunela Crnaja dok se ne nađu alternativna rješenja**
- **Nakon insistiranja UPFBiH: Rekonstrukcija tunela Crnaja tek kad bude osiguran maksimalno nesmetan protok saobraćaja**
- **Održana sjednica UO UPFBiH**
- **UPFBiH traži uvrštavanje Prijedloga zakona o hemikalijama na dnevni red sjednice Doma naroda PFBiH**
- **Predstavnicima medija predstavljeni prijedlozi za izlaz iz ekonomske krize**
- **Djelomično usvojini prijedlozi UPFBiH na Prijedlog o izmjenama i dopunama Zakona o fiskalnim sistemima**
- **UPFBiH uputilo amandmane na Prijedlog zakona o fiskalnim sistemima i na Prijedlog zakona o računovodstvu i reviziji**





## UPFBiH od Vlade FBiH traži prolongiranje obustave saobraćaja zbog rekonstrukcije tunela Crnaja dok se ne nađu alternativna rješenja

Udruženje poslodavaca Federacije Bosne i Hercegovine od Vlade Federacije BiH traži prolongiranje početka radova na rekonstrukciji tunela Crnaja i obustave saobraćaja na magistralnoj cesti M-17 koja povezuje sjever i jug naše države, na dionici Jablanica-Konjic. U pismu upućenom Vladi FBiH, iz Udruženja poslodavaca Federacije BiH insistiraju na hitnom sastanku na kojemu bi bilo precizno

dogovoreno neometano odvijanje saobraćaja na ovoj dionici te da se obustava saobraćaja ne primjenjuje prije održavanja sastanka.

„Radi se o jednoj od najprometnijih dionica u Bosni i Hercegovini i obustava saobraćaja rezultirala bi nesagledivim posljedicama i ogromnim štetama za privredne subjekte u Bosni i Hercegovini, a naročito će se to odraziti na privrednike Mostara, Jablanice, Konjica, ali i za trgovce, turističke i ugostiteljske firme i sve one čija je djelatnost vezana za promet ljudi i dobara. Za privredu BiH koja već trpi velike posljedice uzrokovane pandemijom COVID-19, obustava saobraćaja zbog rekonstrukcije tunela Crnaja, je dodatni udarac od kojega će se još teže oporaviti u narednom periodu“, naglašavaju u Udruženju poslodavaca FBiH.

Podsjećaju na velike posljedice i enormne štete koje je pretrpjela bosanskohercegovačka privreda zbog obustava saobraćaja i pravovremeno neriješenog alternativnog pravca tokom rekonstrukcije tunela Vranduk. Posljedice bi ovoga puta mogle biti i puno veće, jer je pandemija COVIDA-19 već snažno uzdrimala privredu Federacije BiH i Bosne i Hercegovine.

U Udruženju poslodavaca FBiH kažu da su iznenađeni odlukom Vlade Federacije BiH da

se krene u realizaciju projekta rekonstrukcije tunela Crnaja, jer je na zajedničkom sastanku predstavnika Udruženja poslovnaca FBiH, Vlade FBiH i nadležnih tijela zaduženih za saobraćajnice dogovoreno da se gradi novi tunel, a ne rekonstruira postojeći.



Također, podsjećaju na član 73. Zakona o cestama FBiH kojim je definirano da „zabrana ili ograničenje saobraćaja mora se pravovremeno objaviti putem sredstava javnog informiranja ili na drugi pogodan način prema mjesnim prilikama i označiti odgovarajućim saobraćajnim znakovima na cesti“, što u slučaju obustave saobraćaja zbog rekonstrukcije tunela Crnaja nije urađeno.

Udruženje poslodavaca FBiH će formirati ekspertni tim koji će biti na raspolaganju svim članicama Udruženja koje se odluče na sudske tužbe sa zahtjevima za naknadu štete koju će pretrpjeti, a do koje će nesumnjivo doći ukoliko se istraje na obustavama saobraćaja zbog rekonstrukcije tunela Crnaja.



## Rekonstrukcija tunela Crnaja tek kad bude osiguran maksimalno nesmetan protok saobraćaja




Vlada Federacije Bosne i Hercegovine je na inicijativu Udruženja poslodavaca FBiH usvojila zaključak kojim se JP „Ceste Federacije Bosne i Hercegovine“ zadužuje da razmotri mogućnost odgode početka provedbe Programa „Modernizacije magistralnih cesta Federacije BiH“ zbog krize uzrokovane pojavom novog koronavirusa, te da simuliranjem izvođenja radova u tunelu „Crnaja“ izvrši dodatna snimanja intenziteta prometa naizmjeničnim propuštanjem vozila, a da tek nakon toga predloži dinamiku izvođenja stvarnih radova.

Svjesni šta bi usporavanje, ili čak i obustava, saobraćaja na toj dionici značila za privredu i sve učesnike u saobraćaju, usvojen je pomenuti zaključak.

- Konkretno tražimo od stručnih službi Cesta Federacije da u dužem periodu prate, analiziraju i utvrde metod naizmjeničnog funkcionisanja saobraćaja kako građani i privreda, kad počne rekonstrukcija Crnaje, ne bi doživljavali neugodnosti koje su prolazili prilikom radova u tunelu Vranduk.


## Održana sjednica Upravnog odbora UPFBiH



Redovna sjednica Upravnog odbora Udruženja poslodavaca FBiH održana je 22. septembra 2020. godine putem Zoom aplikacije.

Na sjednici su, najprije, članovi raspravljali o Odluci o obustavi saobraćaja na magistralnoj cesti M-17 zbog početka radova na rekonstrukciji tunela Crnaja. Naime, Udruženje poslodavaca FBiH je od Vlade FBiH zatražilo prolongiranje početka radova na rekonstrukciji ovog tunela i obustave saobraćaja na magistralnoj cesti M-17 koja povezuje sjever i jug Bosne i Hercegovine i zatražen je sastanak sa premijerom Vlade FBiH koji do danas nije održan. Direktor UPFBiH Mladen Pandurević podsjetio je članove da je na zajedničkom sastanku predstavnika UPFBiH, Vlade FBiH i nadležnih tijela zaduženih za saobraćajnice, održanom prošle godine, dogovoreno da se gradi novi tunel, a ne rekonstruira postojeći.

Nakon reakcije UPFBiH, Vlada Federacije Bosne i Hercegovine je usvojila zaključak kojim se JP „Ceste Federacije Bosne i Hercegovine“ zadužuje da razmotri mogućnost odgode početka provedbe Programa „Modernizacije magistralnih cesta Federacije BiH“




te da simuliranjem izvođenja radova u tunelu „Crnaja“ izvrši dodatna snimanja intenziteta prometa naizmjeničnim propuštanjem vozila, a da tek nakon toga predloži dinamiku izvođenja stvarnih radova.

Zaključeno je da će Udruženje ponovno tražiti sastanak sa premijerom Vlade FBiH i ministrom prometa i komunikacija FBiH Denisom Lasićem. Na sjednici je također istaknuto da je Udruženje spremno na koordinisano djelovanje sa Privrednom komorom FBiH i Vanjskotrgovinskom komorom BiH, a kako bi zajednički djelovali u rješavanju ovog problema.

Nadalje, direktor UPFBiH Mladen Pandurević izvijestio je članove o poduzetim aktivnostima u vezi sa Prijedlogom seta mjera za saniranje ekonomskih posljedica pandemije koronavirusa. Podsjetio je da je Udruženje sačinilo set mjera koji podrazumijeva kratkoročne, srednjoročne i drugoročne mjere, a koji su podržali predstavnici međunarodnih organizacija u BiH kao i čelnici političkih stranaka koje su formirale Vladu Federacije Bosne i Hercegovine. Članovi su istakli da je potrebno ići na nekoliko konkretnih mjera koji bi išli u pravcu smanjenja opterećenja poslovanja, kao što je donošenje izmjena i dopuna Zakona o doprinosima, Zakona o porezu na dohodak i Zakonu o porezu na dobit.

Razmatrajući materijale za narednu sjednicu Ekonomsko-socijalnog vijeća FBiH, koja je trebala da se održi početkom oktobra a koja je otkazana zbog održavanja sjednice Doma naroda PFBiH, direktor UPFBiH je obavijestio da su u Prijedlogu o izmjenama i dopunama Zakona o fiskalnim sistemima djelomično usvojeni prijedlozi Udruženja. Udruženje će i dalje insistirati na usvajanju 1/3 prijedloga UPFBiH koji nisu usvojeni a koji će, ukoliko se usvoje, bitno olakšati i unaprijediti poslovanje iz ove oblasti, zaključeno je. Udruženje poslodavaca je zauzelo jedinstven stav da će, kada je u pitanju donošenje seta fiskalnih zakona (Zakon o doprinosima, Zakon o porezu na dohodak i Zakon o porezu na dobit), i dalje ostati pri zahtjevima da donošenje zakona mora imati za cilj rasterećenje privrede i smanjenje opterećenja a ne neutralni efekat, jer uopće nije potrebno donositi zakone koji će imati takav efekat.



Upravni odbor je usvojio Odluku o izmjeni Odluke za osnivanje Edukacionog centra UPFBiH. Članovi su pozdravili i podržali ideju osivanja Centra. Kako je istakao direktor UPFBiH, cilj uspostave Centra za edukaciju je osposobljavanje, prekvalifikacija i dokvalifikacija deficitarnih kadrova, a planirano je da UPFBiH sprovodi teoretski dio obuke, a da se praktični dio obuke održava u kompanijama članicama s kojima će se potpisati ugovori o saradnji.

Na sjednici su i potvrđene odluke Izvršnog odboru o imenovanju/reimenovanju predstavnika UPFBiH za člana UO FIPA-e i Odluka o učešće na Projektu „Moj proizvod“.


## **UPFBiH traži uvrštavanje Prijedloga zakona o hemikalijama na dnevni red sjednice Doma naroda PFBiH**

Udruženje poslodavaca FBiH uputilo je predsjedavajućem Domu naroda Parlamenta FBiH Tomislavu Martinoviću i predsjednicima klubova delegata zahtjev za uvrštavanje Prijedloga zakona o hemikalijama na dnevni red naredne sjednice ovog doma.

Ovim zakonom uređuju se razvrstavanje, pakovanje i označavanje opasnih hemikalija, razmjena podataka o hemikalijama kroz sigurnosno-tehnički list, integralni inventar hemikalija proizvedenih i uvezenih, dobra laboratorijska praksa, ograničenja i zabrane supstanci koje izazivaju zabrinutost, uslovi za uvoz i izvoz hemikalija za koje je propisan postupak prethodne saglasnosti, odobrenja za vršenje djelatnosti proizvodnje, stavljanja na tržište i korištenja opasnih hemikalija, sistemsko praćenje hemikalija, stavljanje na tržište deterdženata, nadzor i druga pitanja od značaja za sigurno upravljanje hemikalijama.

Prijedlog zakona usvojen je na sjednici Zastupničkog doma FBiH još u septembru 2019. godine.

## UPFBiH predstavilo predstavnicima medija prijedloge za izlaz iz ekonomske krize



Predstavnici Udruženja poslodavaca FBiH na čelu sa predsjednikom Adnanom Smailbegovićem i direktorom Mladenom Pandurevićem organizovali su poslovni sastanak sa predstavnicima medija, a kako bi razgovarali o mjerama za poboljšanje

poslovnog ambijeta koje je predložilo Udruženje.

Predsjednik Udruženja poslodavaca FBiH Adnan Smailbegović je naveo da Udruženje u posljednjem periodu aktivno radi na izmjenama Zakona o doprinosima i Zakonu o porezu na dobit. Udruženje također insistira na povećanju minimalne plate.







"Ovo su tri najvažnije stvari za rasterećenje privrede. Dosta od ovih stvari je u parlamentarnoj proceduri već dvije godine, otprilike. Danas su u FBiH doprinose 41,5 posto, minimalna plata nešto više od 400 maraka na njih postoje

neoporezive naknade. Vlada je u ponudila da proširi pogrešnu osnovicu i da sve bude oporezivo, kako bi dobili neutralan efekat. Tu je problem dodatnog opterećenja na niske plate. Pozitivni efekti dolaze tek na više plate. Mi tražimo da doprinosi budu maksimalno 30 posto", kazao je Smailbegović.

UPFBiH zahtijeva od izvršne i zakonodavne vlasti u FBiH hitno usvajanje Zakona o doprinosima, kojim će se smanjiti cijena rada i doprinosi i to na maksimalno 30 posto. Također se traži usvajanje Zakona o porezu na dobit kojim će



predvidjeti poreska olakšica po osnovu reinvestiranja. Udruženje također zahtijeva u svojim prijedlozima i povećanje minimalne plaće.

## UPFBiH uputilo inicijativu za odgodu plaćanja PDV-a pri uvozu ili njegovog obročnog plaćanja



Udruženje poslodavaca FBiH uputilo je direktnu Uprave za indirektno oporezivanje BiH Miri Džakuli inicijativu za omogućavanje odgode plaćanja PDV-a pri uvozu ili njegovog obročnog plaćanja. U inicijativi se navodi da se velikom broju poslodavaca zbog korona virusa znatno smanjila privredna aktivnosti i otežalo poslovanje, a

kao posljedica toga javlja se nemogućnost izmirenja PDV-a pri uvozu u propisanom roku koji ne prelazi deset dana od dana obavještanja dužnika o iznosu koji se potražuje.

Pomjerenje ovog roka dovelo bi do većeg priliva sredstava u periodu odgode, a to bi ujedno značilo više novca i za radnike i sigurno izmirenje zakonskih obaveza. Također, kratak rok utječe na likvidnost kompanija, te Udruženje predlaže da se odgodi rok za plaćanje PDV-a pri uvozu i da rok ne bude deset, već 30 dana od dana obavještanja dužnika o iznosu dažbine koji se potražuje ili da se ostavi mogućnost obročnog plaćanja PDV-a. Akt bi važio šest mjeseci od dana donošenja.

Zemlje EU i okruženja su već donijele slične mjere, a sve s ciljem ublažavanja negativnih ekonomskih posljedica izazvanih pandemijom korona virusa, dok je Bosna i Hercegovina jedina država u Europi koja nije preduzela niti jednu mjeru na nacionalnom državnom nivou kojom se pomaže privredi da prebrodi ekonomsku krizu. Prijedlog Udruženja neće dovesti do narušavanja Budžeta, jer poslodavci nisu za neplaćanje zakonskih obaveza, već samo za olakšavanje u smislu pomjerenja rokova ili mogućnosti obročnih otplata.



## Djelomično usvojeni prijedlozi UPFBiH na Prijedlog o izmjenama i dopunama Zakona o fiskalnim sistemima

Vlada Federacije BiH je utvrdila Prijedlog zakona o izmjenama i dopunama Zakona o fiskalnim sistemima u kojem su djelomično usvojeni i prijedlozi Udruženja poslodavaca FBiH.

Između ostalog, usvojen je prijedlog UPFBiH da se ukine fiskalizacija u veleprodaji, odnosno, u Prijedlogu zakona izvršena je izmjena člana 5. Zakona o fiskalnim sistemima koji propisuje izuzeća od obaveze evidentiranja prometa putem fiskalnim sistema. U stavu 2. propisano je da se iz obaveza evidentiranja prometa putem fiskalnih sistema izuzimaju pravna lica koja obavljaju djelatnost trgovine na veliko. Jasno je naglašeno da su to lica koja obavljaju bezgotovinsko plaćanje.

Djelomično je usvojen i prijedlog za uvođenje "real time izvještavanja". Prijedlog UPFBiH je bio da se svaki račun prije izdavanja pošalje Poreznoj upravi na ovjeru, a Porezna uprava će mu dodijeliti broj, koji se odmah vraća obvezniku. Nakon toga, obveznik može ispisati račun građaninu. To bi značilo da stanje na serveru u svakom momentu mora odgovarati stanju u kasi. Međutim, u Prijedlogu se iskoristio već postojeći sistem, odnosno, da se izda račun kupcu te da se u real time vremenu pošalje taj račun na server Porezne uprave. Ukoliko uređaj ne pošalje odmah podatke, isti će imati funkcionalnost da pokušava više puta, dok ne dostavi Poreznoj upravi. Omogućena je i funkcionalnost da se na zahtjev Porezne uprave podaci dostave, ukoliko uređaj nije sam poslao.

Djelomično je usvojen i prijedlog za omogućavanje online pristupa građana sa Poreskom upravom. U svrhu uvođenja provjere računa na serveru Porezne uprave od

strane građana iskoristiti će se već postojeći sistem, odnosno omogućiti provjera putem QR koda. Predviđeno je da se QR kod ispisuje na fiskalnom računu, a građanin će moći putem aplikacije koju razvija Porezna uprava, putem svog mobitela izvršiti provjeru.

Udruženje poslodavaca FBiH nije u potpunosti zadovoljno količinom prihvaćenih prijedloga UPFBiH jer smatra da su pomenuti prijedlozi bitni za olakšavanje i unapređenje ove oblasti poslovanja. Udruženje je započelo konsultacije sa članstvom te će na Prijedlog o izmjenama i dopunama Zakona o fiskalnim sistemima i amandmanski djelovati.

## Rukovodstvo UPFBiH sa predsjednikom SSSBiH




Predsjednik i direktor UPFBiH Adnan Smailbegović i Mladen Pandurević održali su 17. septembra 2020. godine sastanak sa predsjednikom Saveza samostalnih sindikata BiH Mevludinom Bektićem. Na konsultativnom sastanku razgovarano je o izmjenama Zakona o doprinosima, Zakonu o porezu na dohodak, Zakonu o porez na dobit, te povećanju minimalne plaće.



## UPFBiH uputilo UIO inicijativu za donošenje Uputstva o dopuni uputstva o pojednostavljenom carinskom postupku

Udruženje poslodavaca FBiH uputilo je Upravi za indirektno oporezivanje BiH inicijativu za donošenje Uputstva o dopuni uputstva o pojednostavljenom carinskom postupku.



Veći broj članica UPFBiH, izvoznica, traži da se na listu roba za koje se može odobriti pojednostavljeni postupak po fakturi doda i roba iz tarifnih oznaka 9401. Pojednostavljeni postupak bi u velikoj mjeri olakšao

poslovanje kompanijama, ubrzao protoka roba, smanjili bi se troškovi, a rasteretile carinske procedure.

Udruženje taži da UIO u okviru svojih nadležnosti donesete Uputstvo o dopuni uputstva o pojednostavljenom carinskom postupku po fakturi, na način da u Prilogu 4. (Spisak roba koje se mogu izvoziti po pojednostavljenom postupku po fakturi) iz člana 6. dodate robu sljedećih tarifnih oznaka:

- Sjedala (osim onih iz tarifnog broja 9402), uključujući ona koja se mogu pretvoriti u ležaje, i njihovi dijelovi: ostala sjedala, sa drvenim okvirima: tapacirana. TB: 9401 61 00 00

- Sjedala (osim onih iz tarifnog broja 9402), uključujući ona koja se mogu pretvoriti u ležaje, i njihovi dijelovi: ostala sjedala, sa drvenim okvirima: ostala. TB: 9401 69 00 00
- Sjedala (osim onih iz tarifnog broja 9402), uključujući ona koja se mogu pretvoriti u ležaje, i njihovi dijelovi: ostala sjedala, sa metalnim okvirima: tapacirana. TB: 9401 71 00 00
- Sjedala (osim onih iz tarifnog broja 9402), uključujući ona koja se mogu pretvoriti u ležaje, i njihovi dijelovi: dijelovi: od drveta. TB: 9401 90 30 00.

Roba za koju se predlaže da se doda na listu je lako je prepoznatljiva, te ne postoji mogućnost malverzacije sa ovom robom. U većini slučajeva izvozi se renomiranim robnim kućama i roba ide odmah u maloprodaju, što je dodatni argument i pokazatelj da nema prostora za bilo kakve malverzacije sa robom.

## Amandmani UPFBiH na Prijedlog zakona o računovodstvu i reviziji upućeni u ZD PFBiH



Udruženje poslodavaca FBiH je preko zastupnika Zastupničkog doma Parlamenta FBiH amandmansi djelovalo na Prijedlog zakona o računovodstvu i reviziji.

Prijedlog zakona zastupnici će razmatrati na 14. redovnoj sjednici Zastupničkog doma Parlamenta Federacije BiH zakazanoj za 30. septembar 2020. godine.

Amandmane Udruženje možete pogledati [OVDJE](#).



## Predstavnici Easter Mining d.o.o. na sastanku u UPFBiH

Predsjednik i direktor Udruženja Adnan Smailbegović i Mladen Pandurević održali su 29. septembra 2020. godine sastanak sa predstavnicima Društva za istraživanje i eksploataciju rude Eastern mining d.o.o. na kojem je razgovarano o izazovima poslovanja u ovoj oblasti.

Eastern Mining d.o.o. je bosanskohercegovačka istraživačko-razvojna kompanija, koja je u vlasništvu kompanije Adriatic Metals iz Velike Britanije. Primarni cilj kompanije je fokusiran na istraživanje i eksploataciju mineralnih resursa na prostoru općine Vareš. Navedeni cilj ima značajan potencijal za razvoj i napredak Općine Vareš, Zeničko-dobojskog kantona, odnosno države Bosne i Hercegovine. Aktivnosti kompanije su intenzivirane 2017. godine, otkada je isključivo iz sredstava osnivača u ovaj projekat investirano više od 30 miliona KM.

Na sastanku su predstavnici ovog Društva upoznali rukovodstvo

Udruženja o projektu eksploatacije zlata u

Varešu. Kompanija Eastern Mining potpisala je Aneks 4 ugovora o Koncesijskom odobrenju s Ministarstvom privrede Zeničko-dobojskog kantona kojim se, pored cinka, olova i barita, odobravaju i prava na zlato, srebro i bakar potvrđena višegodišnjim



geološkim istraživanjem. Prema trenutnom planu otvaranje rudnika i početak proizvodnje planiran je 2022. godine.

Predstavnici Udruženja poslodavaca FBiH upoznali su prisutne sa aktivnostima koje Udruženje provodi za stvaranje uslova za povoljnije poslovno okruženje. Prepoznavši značaj Udruženja, predstavnici Eastern mining d.o.o. izrazili su interesovanje za učlanjenje.

## UPFBiH uputilo amandmane na Prijedlog zakona o izmjenama i dopunama Zakona o fiskalnim sistemima



Udruženje poslodavaca FBiH je preko zastupnika Zastupničkog doma Parlamenta FBiH amandmanski djelovalo na Prijedlog zakona o izmjenama i dopunama Zakona o fiskalnim sistemima. Prijedlog zakona zastupnici će razmatrati na 14. redovnoj sjednici Zastupničkog doma Parlamenta Federacije BiH zakazanoj za 30. septembar 2020. godine.

Amandmane Udruženje možete pogledati [OVDJE](#).



## Održana online sjednica UO Udruženja poslodavaca Kantona Sarajevo



Na 17. redovnoj sjednici Upravnog odbora Udruženja poslodavaca Kantona Sarajevo, održanoj 01.septembra 2020. godine putem Zoom platforme usvojen je Prijedlog drugog seta mjera za ublažavanje ekonomskih posljedica epidemije COVID-19 Udruženja poslodavaca KS". Usvojeni dokument sadrži prijedlog mjera i aktivnosti za nastavak podrške privrednim subjektima u Kantonu Sarajevo. Udruženje poslodavaca Kantona Sarajevo će dokument uputiti Koordinacionom tijelu Vlade KS, te očekuje od ovo tijelo razmotri prijedloge i iste, nakon rasprave, uputi Vladi na zauzimanje konačnog stava.

Pored toga, Upravni odbor je razmatrao Izvještaj o implementaciji kratkoročnih mjera podrške privredi Kantona Sarajevo. Upravni odbor je usaglasio stavove koje će iznijeti na sjednici Ekonomsko-socijalnog vijeća za područje Kantona Sarajevo, koja je zakazana za 02.09.2020. godine, vezane za navedeni Izvještaj.

Upravni odbor je zauzeo i jedinstven stav o pitanju pravednije podjela tereta krize između javnog i realnog sektora u KS o kojoj će se raspravljati na predstojećoj sjednici Ekonomsko-socijalnog vijeća.

## Udruženje poslodavaca KS uputilo Vladi KS prijedlog II seta mjera za ublažavanje ekonomskih posljedica

Udruženje poslodavaca Kantona Sarajevo uputilo je 01. septembra 2020. godine premijeru Vlade KS Mariju Nenadiću Prijedlog za II set mjera Kantona Sarajevo.

Za nastavak podrške privrednim subjektima u narednim mjesecima, UPKS predlaže da se poduzmu sljedeće aktivnosti:

- Hitno donošenje odluke o raspisivanju Javnog poziva za prijavu privrednih subjekata za pomoć u isplati dijela ili cjelokupnog iznosa minimalnih plaća.
- Uvrštavanje kriterija predloženih od strane Upravnog odbora UPKS:
  - ⇒ 100 posto minimalne plaće za uposlenike kod poslodavca koji ima 70-100 posto pad prometa
  - ⇒ 60 posto minimalne plaće za uposlenike kod poslodavca koji ima 40-70 posto pad prometa
  - ⇒ 40 posto minimalne plaće za uposlenike kod poslodavca koji ima 20-40 posto pad prometa
- Iz planiranih sredstava u Budžetu KS na ime kreditnog fonda izdvojiti sredstva za pokriće kamata za nove ali i zamjenske kredite. Svjesni smo da određeni broj privrednih subjekata nema nikakvih poslovnih aktivnosti, a imaju kredit koji podignut zbog ulaganja u objekte ili opremu koje su trenutno nefunkcionalni.
- Novom podrškom potrebno je obuhvatiti uposlenike koji na dan raspisivanja Javnog poziva imaju zaključen Ugovor o radu kod privrednog subjekta koji ima pad prihoda utvrđen definiranim kriterijima.


Udruženje poslodavaca Kantona Sarajevo očekuje od Koordinacionog tijela Vlade KS da razmotri prijedloge i iste, nakon rasprave, uputi Vladi na zauzimanje konačnog stava.

## Saradnja Vlade i poslodavaca: Vlada TK najavila smanjenje parafiskalnih nameta



Smanjivanjem parafiskalnih nameta i Inicijativom za izmjene Zakona o zdravstvenoj zaštiti Vlada Tuzlanskog kantona će pomoći privrednicima u ovom kantonu da lakše podnesu teret krize uzrokovane pandemijom, ali i da spremnije i konkurentnije nastupe na tržištu.

Naime, na sastanku održanom 25. septembra sa predstavnicima Grupacije poslodavaca TK pri Udruženju poslodavaca FBiH sa delegacijom Vlade Tuzlanskog kantona koju je predvodio premijer Denijal Tulumović razgovarano je o načinima na koje Vlada može utjecati na stvaranje kvalitetnijeg poslovnog ambijenta. Prije svega to se odnosi na smanjivanje parafiskalnih nameta kao što su naknade za općekorisne funkcije šuma, naknade za turističke zajednice i komunalne naknade, ali i izmjene federalnog Zakona o zdravstvenoj zaštiti čime bi se omogućilo da Zavod zdravstvenog osiguranja, u slučaju bolovanja zbog povrede na radu, preuzme plaćanje iznosa naknade radniku nakon 15 dana, umjesto trenutnog stanja kada Zavod brigu o naknadama preuzima nakon 42 dana bolovanja.



"Sve ove mjere imaju za cilj da rasterete poslovanje naših privrednika, da doprinesu stabilnosti njihovog poslovanja, da im pomognu da zadrže postojeća i otvore nova radna mjesta, te u konačnici doprinesu privrednom rastu i poboljšanju konkurentnosti naših privrednih subjekata na tržištu", rekao je premijer Tulumović ističući da je Vlada svjesna problema i da je već poduzela određene korake prema višim nivoima vlasti, ali da se problemi koji su se nakupljali 15 i više godina, ne mogu riješiti za nekoliko mjeseci.

S tim u vezi dogovoreno je da se u narednim danima pripremi i održi tematska sjednica Vlade Tuzlanskog kantona, na kojoj će se razgovarati i poduzeti i konkretniji koraci ka rješavanju prezentirane problematike.

"Stavovi Vlade i poslodavaca nikad nisu bili bliži, što nam daje nadu da će u već dogledno vrijeme doći i do konkretnijih poteza i znatnog poboljšanja poslovnog ambijenta na našem kantonu", složili su se predstavnici poslodavaca.

Osim premijera Tulumovića i domaćina današnjeg sastanka ministra privrede Asmira Hasića, sastanku su u ime Vlade prisustvovali ministar finansija Suad Mustajbašić, ministar trgovine, turizma i saobraćaja Edin Buševac i ministar prostornog uređenja i zaštite okolice Elvir Rožnjaković. Delegaciju Grupacije poslodavaca TK pri Udruženju poslodavaca FBiH činili su predsjednik Upravnog odbora Ramiz Karić, Senad Džambić, Šefik Močić, Zijad Selimović, Ćazim Omić, Samir Hadžić, Kasim Selimović.



## Predstavници UPFBiH na treningu po projektu "Podrška građanima u borbi protiv korupcije"



U okviru projekta "Podrška građanima u borbi protiv korupcije" Centri civilnih inicijativa su, kao implementator projekta, organizovali su trening "Odnosi s javnošću – korištenje društvenih mreža i konvencionalnih medija" za organizacije, dobitnice granta za projekte vođenja građanskih inicijativa i kampanja u oblasti borbe protiv korupcije.

Predstavnici UPFBiH učestvovali su na treningu. Udruženju je odobren projekat "Poslovanje bez korupcije", a cilj projekta "Poslovanje bez korupcije" je doprinijeti smanjenju prostora za koruptivne radnje nosilaca izvršne i zakonodavne vlasti, kao i izloženosti poslodavaca korupciji kako bi se stvorili preduslovi za fer tržišnu utakmicu i poboljšanje poslovnog ambijenta u bh. društvu, kroz iniciranje izmjene postojeće legislative koja potiče korupciju, uspostavu javnih registara, uspostavljanje web platforme za prijavu korupcije i besplatnu pravnu pomoć, pružanje svih neophodnih informacija poslodavcima, te javnu kampanju kojom će se, na osnovu prijave koruptivnih radnji s kojima se poslodavci susreću, vršiti javni pritisak na rješavanje prijavljenih slučajeva korupcije i pozvati na odgovornost institucije i pojedince odgovorne za rješavanje konkretnog problema.

Učesnici su prošli trening o korištenju i ulozi društvenih mreža i tradicionalnih medija, planiranju i provođenju PR kampanja, online promociji i različitim alatima na društvenim mrežama u svrhu bolje vidljivosti rezultata inicijativa koje su pokrenuli u društvenoj zajednici.



# UDRUŽENJE POSLODAVACA

---

**UDRUŽENJE POSLODAVACA FBiH**

**MULA MUSTAFE BAŠESKIJE 12/3, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**